

2 Timoteo

¹ Høøch hädaa nocy nhädiuumby, høøch Pablohaja. Ja'a Jesucristoch jaduhñ xquiuguexyhajp. Ja'a Dios jaduhñ mänaamb cooch jaduhñ xquiuguexyhädät. Coojaja'a Jesucristo hajxy xmiøødhajtäm tu'ugjoot tu'ugwiinmahñdy, paadiä Dios hajxy tøø xyajwiinwaanøoyyäm coo hajxy cøjxta'axiøø xyagjugyhadaänäm neby je'e jiugyhatiän. ² Miičh Timoteo, miičhhøch hädaa nocy nya-jnäjaayøøby. Jaduhñhøch miičh ndsocy nébiøch nhamdsoo huungän. Ween miičhä Diosteedy mayhajt xtiuunä møødä Wiindsøn Jesucristo. Ween xñäxuučh. Weenä hoyhajtä weenhajt xmio'oy.

³ Hojioot howyiinmahñdymøødhøchä Dios nwiingudsähgø'oy nébiøchä nhap nébiøchä ndeedyhajxy jecy wyiingudsähgøøyyän. Hoy ñaaghóoc-høchä Dios nba'ya'axy, mänitøch miičh njahmiejtsta'agy. Mänitøchä Dios jaduhñ nnäma'ay "Dioscujú'uyäp" ja'a miičhcøxpä. ⁴ Nja wi'i yhi-jxtägatsáambiøch miičh, jaduhñhøch nxoondaacpøgät. Xøømdsúhmhøch miičh njahmiejtsta'agy. Njahmiéjchpøch jaduhñ coo miičh hánajty njaančh tehñ jiootmayhaty mänaa hajxy jim nniwiá'xäm. ⁵ Jaduhñhøch njahmiejtspä coo miičhä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä Diosmädia'agy hajxy jayøjp mäbøjtsohn. Tøyhajt jaduhñ coo miičh jaduhñ mbamäbøjpä.

⁶ Mänáajøch miičh jim ngø'ønähgapiän, mänit miičhä Dios mayhajt xtiuunä. Jaduhñ miičh mäjaa xmiooy coo ja'a tiuung mdúunät. Cham nnäma'ay coo mga'a najtshixø'øwät ja'a mayhajt ja'a Dios mänit xtiuunäbä, pero ween hamuumdu'joot mjaac yajtuñ.

⁷ Hix, jaduñä Dios hajxy xyajmädsójcäm coo hajxy nga'a tsähgóoyyämät. Jaduñ hajxy xyajmädsójcämbä coo hajxy nduunämät ja'a miäjaahaam, mөөd coo hajxy hamiñ haxöpy nničhojc nnibia'häyóowämät, mөөd coo hojioot howyiinmahñdy hajxy nyajtúunämät. ⁸ Jaduñds je'e, cab mdsähdiúnät ja'a Dioscөxpä coo ja'a miädia'agy hänajty myajwa'xä. Ni jaduñ mga'a tsähdiúumbät ja'a hөөčhcөxpä, hóyhөch yaa nja tsumyčhänä'ay. Páadyhöch yaa ndsumyčhänä'ay coočhä Dios ja'a miädia'agy nyajwá'xäbä. Cab mdsähgó'owät coo mdsaačhpögät ja'a Diosmädia'agyquiөxpä nébiөch ndsaačhpөquiän hөөčh. Hix, xpiuhbédäbä Dios jaduñ ja'a miäjaahaam. ⁹ Ja'a Dios hajxy tөө xyajnähwaats tөө xyajcuhwáatsäm. Jaaya'ay hajxy tөө xpiädáacäm coo ja'a miädia'agy hajxy hoy ngudiúunämät. Paadiä Dios hajxy jaduñ xyajnähwaats xyajcuhwáatsäm coo hajxy xchójcäm, mөөd coo mayhajt hajxy jecy xtiúunäm ja'a Jesucristocөxpä; ca'a jie'eguiөxpä cooc tyijy hajxy hoy nguħdujthájtäm. Cahnä hädaa yaabä naaxwiin hänajty yhawijy tiөө'xta'agy, tөөyyämä Dios ja'a mayhajt hajxy hänajty jaduñ xtiúunäm. ¹⁰ Coo ja'a Jesucristo hajxy yaa hoy tөө xyajnähwaats tөө xyajcuhwáatsäm, jaduñä Dios ja'a mayhajt yajwiingähxö'nä, ja'a hajxy jecy xtiúunämbä. Coo ja'a Jesucristo hajxy yaa hoy tөө xñähho'túutäm, jaduñ quiähxö'ogy coo hajxy cөjxta'axiөө xyagjyhadáanäm neby je'e jjugyhatiän. Jaduñ jiiy myiñ cujaay maa ja'a Diosmädia'aguiän.

¹¹ Páadyhöčhä Jesucristo jaduñ xquiuguexyhaty coočhä Diosmädia'agy jaduñ nyajwá'xät coo jaaya'ay hajxy jaduñ tөө xyajnähwaats tөө xyajcuhwáatsäm. ¹² Cooč jaduñ nyajwa'xy, páadyhöch jaduñ ndsaačhpөcy. Pero cábөch ndsähdiuñ. Hix, coočhä Dios ja'a miädia'agy jaduñ nmäbөjcä cooč jaduñ

xyajnáhwa'adsa'añ, páadyhøchä tøyhajt nmøødä coo jaduñ hoy cwieendähada'añ pøjátyhøch tøø xyajcø'ødägø'øy. Paady jaduñ cwieendähada'añ coo ja'a Jesucristo yaa quiädaactägatsa'añ hädaa yaabä naaxwiin.

¹³ Jaac panøcx ja'a hoguiuhdujt, ja'ačh miičh tøø nyajnáhixø'øyäbä. Coo ja'a Jesucristo hajxy nmøød-híjtäm tu'ugjoot tu'ugwiinmahñdy, paadiä miädia'agy hamuumdu'joot mmäbójcät, paadiä jäya'ay hamuum-du'joot mdsoc mba'häyówät, ja'a miičh myajnáhixøøbiä.

¹⁴ Hamuumdu'jootä tøyhajt myajwá'xät, ja'a Dios tøø xyajcø'ødägø'øyäbä. Caj myajtägätsät. Coo ja'a Dioshespíritu hajxy nmøødhájtäm, paady miičh jaduñ xpuihbeda'añ.

¹⁵ Tøø miičhädä'a mmädoyhaty coochä mäbøjpädøjc nämay tøø xpuihwaatsnä, ja'a hajxy jim tsohm̄bä Asia-naaxooty, näguipxy møødä Figelo møødä Hermógenes. ¹⁶⁻¹⁸ Pero cábøchä Onesíforo mäböcy tøø xmiädsähdiuñ, hóyhøch yaa nja tsumyčhána'ay. Weenä Dios ja'a Onesíforo ja'a yhuungä tio'oxy ñäxuu'tsä. Coo miejch Roma, mänítøch nägø'ø nädecypiä xyhøxtaayy. Y cooch yaa xpiaaty, mänítøch mayhooc xpuihbejty. Y hamuumdu'joot hajxy jim xpuihbéjtäm Efeso, túhmäts. Coo yhabáadät coo ja'a Dios hajxy hánajty xyajtøyhajtyegáanäm, weenä Dios ja'a Onesíforo mänit ñäxuučh.

2

¹ Huung Timoteo, weenä Jesucristo xpuihbety, jaduñ mga'a tsähgø'øwät mänaa. Coo ja'a Jesucristo hajxy jaduñ nmøødhíjtäm tu'ugjoot tu'ugwiinmahñdy, paadiä mayhajt hajxy jaduñ xtiúunäm. ² Mänájøch miičhä Diosmädia'agy nyajwiingapxø'øyän, nämayyä jäya'ayhajxy hánajty miämädoona'ay. Jaduñ miičh wiinghana'c mnajtsapxøødiägätsät, ja'a hajxy hoy

cudiuumbä, ween wiinghäna'c hajxy jiaac tehṃ ñajtscapxøðiägäjtšägumbä.

³ Ja'a Jesucristocøxpä mmee'xtügät coo hānajty mdsaačhpøcy, nebiä soldadohajxy miee'xtuquiän.

⁴ Hiḅ, ja'a soldadohajxiä, jaduñä jioot hajxy piäda'agy coo hajxy ween quiimayii ja'a wyiindsøn'hajxy. Cab jaduñ yhähixø'øy coo wiingtuung hajxy yhöxtá'awät.

⁵ Jaanä jaduñduhmbä, ja'a häyø'pädøjc-hajxiä, coo hajxy jaduñ hoy yhäyø'øgät nebiä cuhdujt myiñän, mänit hajxy hawiinmats quiuhäyø'øgät. Pero coo hajxy quia'a häyø'øgät, cab hajxy tii piäadät. ⁶ Jaanä jaduñduhmbä, ja'a yuubä pujxpähajxy hoy cuduumbä, je'edshajxy jaduñ jawyiin mäjúuyyäp. ⁷ Yajcopcø'øw hoy nébiøch chamṃ nmāna'añ, weenä Dios jaduñ xquiøxy yajwiinjuø'øy.

⁸ Ja'a Jesucristo, ja'a David jecy yhaphajt yhoc-hajt. Coo ja'a Jesucristo hānajty tøø yho'ogy, mänit jiuypiojtäga-jch. Ja'a Jesucristocøxpøch nnä'ägädä yajwiingapxø'øy-haty. ⁹ Coočhä Jesucristocøxpä jaduñ nyajñähixø'øy, páadyhöch yaa ndsaačhpøcy. Páadyhöch yaa ndsumy-čhäna'ay nebiä cahwiindøybän. Pero cabä Diosmädia'agy jaduñ mänaa yhadugyii. Wiinduhmyhagajpt jaduñ wia'xy. ¹⁰ Coo jaduñ hoy miaajä wia'xy, páadyhöch yaa hoy ñejpiä mmee'xtucy, weenä jäya'ayhajxy jaduñ ñäh-waats quiuhwaatspä, ja'a Dios jaduñ tøø yajnähdíjjiäbä coo ja'a Jesucristo hajxy miøødhídät tu'ugjoot tu'ugwi-inmahñdy, møød ween hajxy yagjyghadyii cøjxta'axiøø nebiä Dios jigyhatiän.

¹¹ Hiḅ, coo hajxy nniñähdíjcämät coo hajxy nhó'cämät nebiä Jesucristo yho'quiän, mänit hajxy jaduñ njugy-hájtämät cøjxta'axiøø nebiä Jesucristo jigyhatiän. Møød jaduñ hajxy jimṃ nhidáanäm maa je'e yhitiän. Tehṃ tiøyhajt jaduñ. ¹² Jaanä jaduñduhmbä, coo hajxy

nnee'xtújcámät, mänitá Jesucristo hajxy jim xmiøød-hanéhmämät. Pero coo hajxy nnijioğápxämät cooc tyijy hajxy nga'a hixyhájtäm, cab hajxy jim xyajtägøøyyämät maa je'e yhitiän. ¹³ Hoy hajxy nja høhndaácäm, cabä Jesucristo mänaa yhøhnda'agy. Hoy miänaajä tiømiädi-a'agyhaty.

¹⁴ Myagjahmiejtstá'agäbä mäbøjpädøjc jaduhñ nébiøch naamnä tøø ngujaayän. Hoorä, jaduhñ myajwiin-gapxø'øwät coo ja'a capxiä mädia'agy hajxy quia'a yajtsibø'øwät, ja'a ca'a tsoobaatpä. Jaduhñä Dios hajxy xyhanéhmäm. Cab jaduhñ tiuungpaady coo hajxy jaduhñ yajtsibø'øy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy yhabø-ga'añ. ¹⁵ Hamuumdu'jootä tøyhajt myajnähixø'øwät ja'a Jesucristocøxpä, jaduhñä Dios xquiumáyät, jaduhñ mga'a tsähdiúnät. ¹⁶ Cabä capxiä mädia'agy myajcapxiø'øwät, ja'a ca'a tsoobaatpä. Ja'a jäya'ayhajxy jaduhñ tehngajnä yajcapxiøøbiä, tehngajnä hajxy jaduhñ nøcxy tiu'udägoyya'añ. ¹⁷ Y maas nämayyä jäya'ayhajxy jaduhñ tiu'udägoyya'añ coo ja'a capxiä mädia'agy hajxy jaduhñ miädówät, ja'a jaduhñ ca'a tsoobaatpä. Tøø ja'a Himeneo jaduhñ tiu'udägooñä møødä Fileto. ¹⁸ Tøø ja'a tøyhajt hajxy ñajtshixøøñä. Jaduhñ hajxy yhøhnda'agy cooc tyijy hajxy nga'a juyypiojtgatsáañäm. Ja'a mäbøjpädøjc-hajxy näje'e, coo hajxy jaduhñ wyiinhøøñii, cabä Diosmädia'agy hajxy jaduhñ hoy miäbøgaannä. ¹⁹ Pero tøø ja'a Dios hajxy xpiädaácäm coo ja'a miädia'agy hajxy tehngajnä nbanócxämät. Jaduhñä Dios tøø miäna'añ cooc ñajuø'øy pønä miädia'agy hamuumdu'joot mäbøjcäp. Jaduhñ tøø miänaambä coo ja'a haxøøgcuhdujt hajxy ween ñajtshixø'øy pønjaty niñänøømäp coogä Diosmädia'agy hajxy miäböcy.

²⁰ Maa ja'a mäyøøjäya'ay tiøjcän, madiu'u tøy jiiy.

Jiibiä orotexy, mөөdä platatexy, mөөdä quepychechtiexy, mөөdä pochtiexy. Tsoobaatpä orotexy mөөdä platatexy. Cabä quepychechtiexy jiaty tsoobaady mөөdä pochtiexy. ²¹ Jaanä jaduһnduhmbä, pөnjatiä haxөөгwiinmahңdy najtshixөoby, hoy ja'a Diosmädia'agy hajxy jaduһn pi-anöcxät. Hoy hajxy jaduһn quiudiünät waambaty hajxy yhane'emyii ja'a Wiindsón Jesucristo. Jaduһn hajxy quiu-mayójät.

²² Pero miičh, mnajtshixó'өwäbä haxөөгwiinmahңdy nebiä muutsc-häna'c-hajxy naxy yhadsoquiän. Ja'a mäbөjpadөjcä Dios hajxy hamuumdu'joot pa'yaaxpä, howyiinmahңdy hajxy miөөd. Miäbөjpiä Diosmädi-a'agy hajxy. Hamiң haxөpy hajxy ñičocy ñibia'häy-oyii. Cab hajxy chiptsocy. Jaduһn miičh hamuumdu'joot mbahíxät. ²³ Caj myajtägó'өwät maa häna'cä capxiä mädia'agy hajxy nä'ä nägoobä yajcapxiө'өyän, ja'a ca'a tsoobaatpä, ja'a ca'a tuungpaatpä. Ja'a capxiä mädi-a'agy jaduһmbä, ja'a tsipä pleetä yhöjx tiocy je'eduhң, túhmäts. ²⁴ Pөnjaty yaa moonsähajtäp ja'a Dios hädaa yaabä naaxwiin, cab hajxy tii yajtsiptá'agät. Hojiot hajxy miөөdhádäp hoy ñä'ä pөngөxpä. Hoy yajxon hajxy yajnähixó'өwät. Mee'xtügäp hajxy jaduһn. Cab hajxy jiootmä'adät. ²⁵ Mee'xxieemiä miädsip hajxy yhoj miägäpxät. Weһndä Dios jaduһn miäná'anät coo ja'a miädsipä yhaxөөгcuhdujt hajxy ñajtshixó'өwät, weenä төyhajt hajxy jaduһn wyiinjuө'өy. ²⁶ Ween hajxy jaduһn wyiinmahñmech, hoy hajxy hänäjty төө jia wiinhөөñii ja'a möjcu'ugong. Paadiä möjcu'ugong jaduһn jia wi'i miäwiinhөөna'añ; ja wi'i miähane'emaamb jaduһn.

3

¹ Pero huuc wiinjuө'өw miičh hädaa. Coo häna-jty yhabaada'añ coo ja'a Jesucristo yaa quiädaactägat-

sa'añ hädaa yaabä naaxwiin, mänitä tsø'ty häyohn jia-da'añii yhabeta'añii. ² Haxøøgjatiä jäya'ayhajxy hä-najty jiatcø'øwa'añ. Jootmøj hajxy hänajty ñibiäda'a-ga'añii. Jiaančh tehṃ yhadsogaambiä xädø'øñ hajxy. Niguiumayaañäp hajxy hänajty. Yajcumayaamb hajxy hänajty. Capxtägoyyaamb hajxy hänajty. Cabä tiaj tieedy hajxy hänajty wyiingudsähgø'øwa'añ. Cab hajxy hänajty tii yhojiäwø'øwa'añ. Cabä Diosmädia'agy hajxy hänajty miäbøga'añ. ³ Cabä yhuungä tio'oxy hajxy hänajty choga'añ. Cab hajxy hänajty pøn miee'x-a'añ. Mänähøønø'øwaamb hajxy hänajty. Cabä howyi-inmahñdy hajxy hänajty miøødhada'añ. Mähäyoowhix-aamb hajxy hänajty. Cabä hoybä weenbä hajxy hänajty choga'añ. ⁴ Tioogaambiä miägu'ughajpä hajxy hänajty. Cab hajxy hänajty hodiägaamby wyiinmahñdyhada'añ tii hajxy hänajty tiunaamby. Yhøxta'awaamby hajxy hänajty neby hajxy xioondá'agät. Cabä Dios hajxy hänajty wyiingudsähgø'øwa'añ. ⁵ Jaduhñ hajxy hänajty ñibiäda'a-ga'añii nebiä häna'cä Diosmädia'agy mäbøjpän, pero cab hajxy hänajty tøyhajt miäbøga'añ.

Pønajaty jaduhñ haxøøg jatcøøby, naxy jaduhñ mdehṃ piuhwá'adsät. ⁶ Jii cahwiindøyhäna'c-hajxy näje'e, jaančh tehṃ yhøhndaacp hajxy. Naxiä to'oxiøjc hajxy wyi-inhøøñ, ja'a hajxy tii ca'a jajp ca'a najuøøbiä. Ja'a to'oxiøjc-hajxy jaduhñbä, cabä howyiinmahñdy hajxy ñäl'ägädä møødä. Hamdsoojoot hajxy jaduhñ yajwiin-høøna'añ. ⁷ Hoy ñä'a mädyii mädia'aguiä hajxy jaduhñ jia wi'li yhabøga'añ, pero cabä tøyhajt hajxy ñäl'ägädä wiinjuø'øwa'añ. ⁸ Ja'a häna'c-hajxy jaduhñ høhndaacpä, haxøøgä wyiinmahñdy hajxy. Cabä Diosmädia'agy hajxy miäbøga'añ. Jaduhñä tøyhajt hajxy miädsibø'øy nebiä Janes ja'a Moisés hajxy jecy miädsibøøyyän møødä Jam-bres. ⁹ Cabä Janeshajxy jecy miäjädaacy. Paady ha-

jxy jaduhñ quia'a mājādaacy coo howyiinmahñdy hajxy hānajtý quia'a mōōdā. Ni hāna'c-hajxy jaduhñ quia'a mājāda'agaambā, ja'a hajxy jāda'ahaty hōhñdaacpā.

¹⁰ Hoorā, tōōch miičh xyhixy coočhā tøyhajt nya-jnāhixø'øy, coočh hoy njāya'ayhaty. Howyiinmāhñdy-hōch nmōōd. Nmābōjpiōchā Diosmādia'agy hamuumdu'joot. Mee'xxiéemyhōchā jāya'ay nmāgapxy. Hoy piōñoch ndsocy nme'e'xy. Cābōchā Diosmādia'agy mānaa nnānuuxø'øy.

¹¹ Jaanā jadúhñhōch miičh tōō xyhijxpā coočh hoy miānaajā nme'e'xtucy, hoy ñējpiōch hānajtý nja tsaächpøcy, nébiōch jim tōō njaty tōō nhabetiān Antioquía, mōōd jim Iconio, mōōd jim Listra. Madiú'ujōch jim ndsaačhpøjcy. Pero cābōchā Dios mānaa xñajtshixø'øy. Hoy miānāajōch jaduhñ xcwieendāhaty.

¹² Haaga jaduhñā jāya'ayhajxy chaačhpøgaambā pønjatiā jioot pādaacp maa ja'a Jesucriston coo hajxy jaduhñ hoy jiāya'ayhādāt.

¹³ Pero ja'a cahwiindøybāhajxy mōōdā hōhñdaacpāhajxy, maas haxøog hajxy tehngajnā jiatcø'owa'añ. Māwiinhøonaamb hajxy mōōd hajxy yajwiinhøonaambā.

¹⁴ Pero miičh, naxiā Diosmādia'agy tehngajnā mjaac tehñ pianōcxāt, ja'a miičh hamuumdu'joot tōō mmābōquiābā. Haa ca'a, hōōch miičh jaduhñ tōō nyajnāhixø'øy, mōōdā mdaj mōōdā mdajhoc. Paady miičh hoy tōō mhabøcy.

¹⁵ Chuucnā miičhā Diosmādia'agy mdāgøøyy capxtaacpā. Jiibiā tøyhajt hajxy nbāatām neby hajxy hoy nnāhwaats nguhwāatsāmāt. Coo hajxy jaduhñ nmābōjcām ja'a Jesucristocøxpā, jaduhñ hajxy nnāhwaats nguhwāatsām.

¹⁶ Ja'a Diosmādia'aguīā, cøxiā Dios jaduhñ yagjahyyā. Jaančh tehñ tiuungpaatpā Diosmādia'agy jaduhñ. Hahixøøby jaduhñ coo ja'a jāya'ay hajxy nyajnāhixøøyyāmāt. Jaduhñ hajxy njoj nmāgāpxāmāt. Jaduhñ hajxy nyajwiinxiic

nyajwiingapxóøyyämät coo ja'a tøyhajt hajxy pianócxät, mөөd coo hajxy hoy jiäya'ayhädät. ¹⁷ Pönjatiä Dios tөө yajnähdijy coo ja'a miädia'agy yajwá'xäxät, ween hajxy ca'xy pedyii yhaböcy, jaduñ hajxy hoy yajtuunǵpáadät hoy ñä'ä maajä.

4

¹ Coo ja'a Jesucristo yaa quiädaactägatsa'añ hädaa yaabä naaxwiin, mänit tiägö'owa'añ mähanehmbä. Mänitä jäya'ayhajxy nägöxiä yajtøyhajtyega'añii, mөөd hajxy hänajty jujcypiä, mөөd hajxy hänajty tөө yhö'oguiäbä. Ja'a Dioscöxpä mөөdä Jesucristocöxpä, jaduhñhöch miičh nmägapxy nhane'emy ² coo ja'a Diosmädia'agy hoy ñä'ä mänaajä myajwá'xät, mөөd coo ja'a cu'ug myajmäböǵät, mөөd coo mhoj mmägápxät, mөөd coo myajwiingapxó'owät coo hajxy jaduñ miäböǵät. Mee'xxieemiä Diosmädia'agy myajnähiš'owät tehngajnä. ³⁻⁴ Hiç, habáatnáp jaduñ coo ja'a cu'ugä Diosmädia'agy hajxy quia'a tsogaannä. Cabä tøyhajt hajxy jaduñ miädowaannä. Hoy ñä'ä mädyii mädia'aguiä hajxy hänajty wyi'i miädowa'añ, nägoo hänajty quia'a töyyä. Mayyä yajnähišöbiädöjc hajxy jaduñ yhöxta'awa'añ, ween hajxy hänajty jaduñ yajnähišö'yii nebiatiä jioothajxy hänajty chocy. ⁵ Pero miičh, tehngajnä howyiinmahñdy mmөөdhädät. Mmee'xtügáp jaduñ coo hänajty mdsaačpöcy. Myajwá'xäbä Diosmädia'agy. Hamuumdu'joot mgudiúnät waambatiä Dios tөө xyhane'emy.

⁶ Höčh, ja weenjaty quia'a habaady coočh häna'c xyagho'oga'añ ja'a Jesucristocöxpä. Nähjöjp tu'ujóphöch hädaajän. ⁷ Tөөčhä haxöögpä njöjtäna'ay. Tөөčh nmäjä-da'agy. Tөөčh hamuumdu'joot ngudiun waambátyhöchä

Dios tøø xyhane'emy. ⁸ Chámhøch njøbhixy coočhä Wiindsøn Jesucristo jim xpiäda'aga'añ hawa'adstuum. Mänitøch jim xpiäda'aga'añ coo ja'a jäya'ayhajxy hänajty nägøxiä yajtøyhajtyega'añii. Hoguiuhdujthaamä Jesucristo hajxy jaduhñ xyajtøyhajtyegáanäm. Cábøch nid- iuhm jim xpiäda'aga'añ hawa'adstuum. Pønjaty jaduhñ jøbhixp hamuumdu'joot coo ja'a Jesucristo yaa quiä- daactägatsa'añ hädaa yaabä naaxwiin, nägøxiä hajxy jim piäda'agáanäbä hawa'adstuum.

⁹ Huuc min yaa maaçh høøçhän. Mhadó'ødsäp jaduhñ.

¹⁰ Hix, tøøçhä häna'c xpiuhwa'açh nämay. Haa ja'a Demas, tøø je'e ñøcxy Tesalónica. Paady yaa tøø choon coo chána'awa'añ yhäyowa'añ. Haa ja'a Crescente, tøø je'e ñøcxy Galacia. Haa ja'a Tito, tøø je'e ñøcxy Dalmacia.

¹¹ Jagóoyyøçhä Lucas yaa xjiaac møødhyty. Tunä mayhajt, nøcxä Marcos wowø'øg. Yaa mwoomínät. Hóyhøch yaa xpiuhbédät. ¹² Haa ja'a Tíquico, jímhøch tøø nguexy Efeso. ¹³ Coo miich yaa mmínät, mhuc túnäbä mayhajt. Høøçhä nnähgämëm tu'uwijsäc. Jímhøch tøø nnähgue'- egy Troas maa ja'a Carpo tiøjcän. Møødhøçhä nnoxy xpiøcmínät møødä animalhac-hädiüñäbä.

¹⁴ Haa ja'a Alejandro, ja'a pujxthädiuumbä, tøøch cøxypäneipy xñähøønø'øy. Ja'a Dios jaduhñ yaghawi- imbídäp. ¹⁵ Cahwiindøy ja'a Alejandro jaduhñ. Mniyaj- copcø'øwøøjäp. Møj may ja'a Alejandro xmiädsiphajtäm coo ja'a Diosmädia'agy hajxy naxy nyajwá'xäm.

¹⁶ Mänáajøch jayøbajt nyajnäxø'øwø'øyän, cábøch pøn mänit xñähgapxtuuty. Nägøxiøçhä häna'c xpiuhwaach. Pero cab jaduhñ ñeipiä. Weenä Dios jaduhñ miee'xy. ¹⁷ Mäjahnädiuumhøch hänajty. Mänitøçhä Dios xñäwaañ. Mänitøçhä mäjaa xmiooyy, jadúhñhøçhä jäya'ayä Diosmädia'agy hoy nyajwiingapxøoyy, ja'a hajxy ca'a judíospä, ween hajxy jaduhñ nägøxiä miäbøcy.

¹⁸ Xcwieendähadäämbøchä Dios maa ja'a haxøøg ca'a hoybän. Xyajnähwa'ads xyajcuhwa'adsäämbøch jadhñ. Jadúhñhøch jim xyajnøcxa'añ tsajpootyp maa je'e yhane'emiän. Tsøgä Dios hajxy hoy miänaajä wiingudsähgøøyyäm. Amén.

¹⁹ Huuc yajpoo'x ja'a Prisca ja'a høøchcøxpä, møødä Aquila, møødä Onesíforo yhuungä tio'oxy. ²⁰ Haa ja'a Erasto, jim je'e miähmøøyy Corinto. Haa ja'a Tró-fimo, jímhøch nnähgueecy Mileto. Pójcäp hänäjty je'e. ²¹ Habáatnäp jadhñ coo tøøhc yhida'añ. Naxy mdehm myínät. Mhadó'ødsäp jadhñ. Nägøxiä miičhä mähøjpadøjc yaa xyajpoo'xy møødä Eubulo, møødä Pudente, møødä Lino, møødä Claudia.

²² Ween miičhä Wiindsón Jesucristo xmiøødhity. Weenä hoyhajtä weenhajtä xmiø'oy. Amén.

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 9 Sep 2021 from source files dated 19 Nov 2020

4e564219-157f-5807-b810-47a15308b8b8